



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2010. GODINU **PARTIJE PRAVOG PUTA**

Broj: 03-07-6-230/11
Sarajevo, 7. maj 2012. godine

SADRŽAJ

MIŠLJENJE REVIZORA.....	3
1.UVOD.....	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1. NALAZI.....	5
5.2. PREPORUKE.....	6

MIŠLJENJE REVIZORA

Služba za reviziju finansiranja političkih stranaka izvršila je pregled finansijskih izvještaja Partije pravog puta i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata opštih izbora, održanih u oktobru 2010. godine.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i članom 15.10 Izbornog zakona BiH i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

Partija pravog puta nije ispoštovala odredbe člana 6. stav (2) i člana 11. stav (1) i (3) Zakona o finansiranju političkih stranaka jer nije prijavila prilog fizičkog lica, ne vodi adekvatne evidencije o svojim prihodima i rashodima i izvještaj nije popunila u skladu sa Pravilnikom o godišnjim finansijskim izvještajima političkih stranaka.

Pregledom, odnosno kontrolom finansijskog izvještaja, osim gornjih napomena nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka niti na finansiranje troškova izborne kampanje suprotno odredbama člana 15.10 Izbornog zakona BiH.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled finansijskih izvještaja Partije pravog puta i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata opštih izbora, održanih u oktobru 2010. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka. Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Partija pravog puta je iskazala ukupne prihode u iznosu od 13.567,46 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk. prih. %
1	Članarina	0,00	0,00%
2	Prilozi fizičkih lica	13.346,76	98,37%
3	Prilozi pravnih lica	0,00	0,00%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	220,70	1,63%
	Ostali prihodi	0,00	0,00%
	Ukupni prihodi:	13.567,46	100,00%

U godišnjem finansijskom izvještaju politička stranka je iskazala ukupne rashode u iznosu od 13.004,38 KM.

2. PREDSTAVLJANJE POLITIČKE STRANKE

Naziv političke stranke: Partija pravog puta. Skraćeni naziv: PPP.

Politička stranka je registrovana 31.03.2010. godine u Općinskom sudu u Sarajevu, broj upisa 065-0-F1-10-000003.

Sjedište političke stranke je u Sarajevu, Butilska do 11.

Za zastupanje stranke ovlašten je Admir Pozderović, predsjednik stranke.

Lice ovlašteno za podnošenje finansijskih izvještaja za 2010. godinu je Admir Pozderović.

Prema podacima iz godišnjeg finansijskog izvještaja za 2010. godinu, Partija pravog puta nema niže nivoe organizovanja.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Partije pravog puta za 2010. godinu i finansijski izvještaj za period od dana podnošenja prijave za ovjeru za izbore do dana ovjere rezultata opštih izbora, održanih u oktobru 2010. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka i da li su troškovi predizborne kampanje u okviru zakonom dozvoljenih.

Obim pregleda i kontrole finansijskih izvještaja Partije pravog puta obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka i odredbama člana 15.10 Izbornog zakona BiH, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih lica, prihode iz budžeta i troškove predizborne kampanje.

4. PRETHODNE KONTROLE I REVIZIJE

Kontrola finansijskih izvještaja Partije pravog puta se obavlja prvi put.

5. NALAZI I PREPORUKE

5.1. NALAZI

a) Na osnovu obavljenog pregleda godišnjeg finansijskog izvještaja i dodatne dokumentacije utvrđeno je da je Partija pravog puta prekršila odredbe člana 6. stav (2) Zakona o finansiranju političkih stranaka.¹

Stranka je ostvarila nenovčani prilog koristeći poslovne prostorije fizičkog lica bez naknade,² za potrebe rada stranke a da na taj način ostvareni prilog nije prijavila u finansijskom izvještaju, što je suprotno odredbama člana 6. stav (2) Zakona.

b) Partija pravog puta je prekršila odredbe člana 11. stav (1) i (3) Zakona o finansiranju političkih stranaka.³

¹ Prema odredbama člana 6. stav (2) Zakona o finansiranju političkih stranaka, ako ukupan iznos priloga jednog lica iz člana 4. stav (1) Zakona premašuje 100 KM, ta uplata se mora unijeti u finansijski izvještaj u skladu sa članom 11.

² Ugovor o zakupu.

³ Prema odredbama člana 11. stav (1) Zakona o finansiranju političkih stranaka, političke stranke su obavezne da vode evidencije o svojim prihodima i rashodima.

U skladu sa odredbama člana 11. stav (3) Zakona o finansiranju političkih stranaka, stranka podnosi finansijski izvještaj u formi koju odobri Centralna izborna komisija, a u skladu s tim donesen je Pravilnik o godišnjim finansijskim izvještajima političkih stranaka kojim su propisani sadržaj i forma finansijskog izvještaja („Službeni glasnik BiH“ broj 61/06).

- Stranka ne vodi adekvatne evidencije o svojim prihodima i rashodima, što je suprotno odredbama člana 11. stav (1) Zakona o finansiranju političkih stranaka.

U obrascu 3-e finansijskog izvještaja (Nenovčane donacije i računi koje politička stranka nije imala obavezu platiti) stranka nije iskazala nenovčani prilog koji je ostvarila korištenjem poslovnog prostora bez naknade za potrebe rada stranke, čime je postupila suprotno odredbama člana 18. Pravilnika o godišnjim finansijskim izvještajima političkih stranaka.⁴

Pregledom poslovnih knjiga stranke utvrđeno je da stranka troškove evidentira u trenutku plaćanja računa, a ne u momentu kada je trošak nastao, odnosno kada je stranci pružena usluga ili izvršena prodaja. Uvidom u poslovne knjige stranke utvrđeno je da je stranka u 2010. godine ostvarila rashode u iznosu od 13.004,38 KM, a pri njihovom evidentiranju nije stvarala obavezu prema dobavljačima. Na taj način stranka ne uspostavlja adekvatne evidencije o svojim rashodima i obavezama.

Takođe, utvrđeno je da je stranka u poslovnim knjigama na jednom analitičkom kontu evidentirala sve prihode koje je ostvarila u 2010. godini, te ih ne razdvajajući analitički po vrsti prihoda, a da je bila obavezna.

- Finansijski izvještaj nije popunjen u skladu sa Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).

U obrascu 3-a finansijskog izvještaja (Prilozi fizičkih lica veći od 100 KM) stranka nije iskazala jedinstveni matični broj za jedno fizičko lice koje je stranci dalo prilog u iznosu od 500,00 KM dana 18.05.2010. godine. Neiskazivanjem jedinstvenog matičnog broja u finansijskom izvještaju stranka je postupila suprotno odredbama člana 14. Pravilnika.⁵

Troškovi predizborne kampanje

Partija pravog puta postupila je u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 2.987,38 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM⁶ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Partija pravog puta je u svrhu izborne kampanje mogla da potroši 681.705,30 KM.

5.2. PREPORUKE

Preporučuje se Partiji pravog puta da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

⁴ Član 18. Pravilnika nalaže da se u obrazac 3-e (Nenovčane donacije i računi koje politička stranka nije imala obavezu platiti) unose sljedeći podaci: naziv organizacionog dijela političke stranke, donator, vrsta poklona ili usluge, datum kada je poklon primljen, ukupna vrijednost poklona ili usluge i vrijednost koju politička stranka nije imala obavezu platiti.

⁵ Član 14. Pravilnika nalaže da se u obrazac 3-a (Prilozi fizičkih lica veći od 100 KM) unose sljedeći podaci: naziv organizacionog dijela stranke, ukupan iznos priloga čija je pojedinačna vrijednost manja od 100 KM, prezime i ime donatora čiji je prilog veći od 100 KM, jedinstveni matični broj donatora, datum kada je prilog dat i iznos priloga.

⁶ Član 15.10 stav 2. propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da postupa u skladu sa odredbama člana 6. stav (2) Zakona o finansiranju političkih stranaka odnosno da prijavljuje svoje prihode i*
- *da postupa u skladu sa odredbama člana 11. stav (1) i (3) Zakona o finansiranju političkih stranaka odnosno da vodi adekvatne evidencije o prihodima i rashodima te da finansijske izvještaje koje podnosi Centralnoj izbornoj komisiji BiH sačinjava u formi propisanoj Pravilnikom o godišnjim finansijskim izvještajima političkih stranaka.*

KOMENTAR

Partija pravog puta nije se očitovala na nalaze revizije i mišljenje revizora dato u preliminarnom izvještaju o pregledu godišnjeg finansijskog izvještaja za 2010. godinu koji je stranci dostavljen 30.11.2011. godine.

Mr. Hasida Gušić, šef Službe za reviziju

Veliborka Kenjić, revizor